

- 100 Ac me plus pungit¹, oculum quam pungat² arista.
 Conscia mens sceleris nimis interius lacrimatur,
 Quod caro cum sentit quandoque molesta gravatur.
 Sarcina tanta nequit deponi nocte dieque,
 Nunquam lenitur sompno, motu, requieque.
- 105 Hanc³ augere iocus, sompnus, potus, cibus audet,
 Carnis enim moles non ni⁴ per talia gaudet.
 Si michi prosperitas contingat temporis huius
 Pro lucro⁵ levis atque ioci species alicuius,
 Tunc onerosior est michi mantica plena venenis,
- 110 Artanturque suis gravius mea colla cathenis,
 Si vero veniant contraria deliciarum,
 Per dampni luctusque gravis conamen amarum,
 Tunc⁶ moderatior est michi mantica plena timoris,
 Atque remissior est michi iuncta cathena doloris.
- 115 Error enim nobis heret penitus furibundis,
 Nec volumus Christo rebus servire secundis.
 Ad laudem Christi non imus cottidiani,
 Qui quasi mundani specie velamur⁷ inani.
 Credimus ad tempus, non omni credimus hora,
- 120 Obruimur vitiis, vacuati vite⁸ decora.
 Nam quis episcopus est, abbas quis, quisve sacerdos,
 In cuius fructu pietatis sit pariter dos?
 Latos pontifices per castra levi palefrido
 Infestos reddit cumulandi plura cupido.
- 125 Pelliciis variis tegitur pellis ruitura,
 Ambulat in magnis, cito quod nescit moritura⁹.
 Est sibi cura sui, cui non timor est animarum,
 Quas sibi commisit mala copia divitiarum.
 Servitio regis vel habendis rebus amenis
- 130 Quod presul prebet, melius preberet egenis.
 Edificat presul castrensis robora muri,
 Sed non edificat templi sollempnia puri.
 Militat ipse miser cum militia miserorum,
 Sed cum sanctorum non certat agone virorum.
- 135 Ad lepores citius¹⁰ festinat tendere vultum,
 Quam pius ad misse celebri dulcedine cultum.
 Sub pastoralis cura non servat ovile,
 Quod lupo aggrediens agmen dispergit herile.
 Non ita Martinus presul vigilare solebat,
- 140 Qui grege pro proprio sua pauperibus tribuebat.
 Corporeum cultum numquam Martinus amabat,
 Qui votis animas sibi commissas decorabat.

1) 'pungit plus' Clar. 2) 'pungit' Clar. 3) 'Hac' beide Hss.
 4) 'quid' Rem. 5) 'lucris' Clar. 6) 'Nunc' beide Hss. 7) 'vetamur'
 beide Hss. 8) 'mente' Clar. 9) Rem. f. 174 v. 10) 'cuius' Rem.